

Recordatorio 20 año di fallecimiento di "Caruso" Booy



ORANJESTAD (AAN): Riba Dialuna 18 di Oktober 2010, ta recorda e di 20 aniversario di e fayecimiento di un di pionero-nan den radio difusion na Aruba, Sr. Hubert Erquilles Antonio Booy miho conoci como Caruso, y tambe conoci como un di e pioneronan den transmission riba Frecuencia Modula (FM) na Aruba cu e apertura di su propio emisora na 1978 cu a worde bautiza cu e nomber di Radio Caruso Booy FM 'E Baranca di Diamante, The Diamond Channel', anque actualmente no ta den aire, ta un emisora cu semper a keda graba den curazon di Pueblo di Aruba como un emisora masha stima cu a worde opera pa famia Booy pa hopi aña y ademas tabata un di e promer generacion di emisora-nan na Aruba riba e banda FM.

Dialuna a dedica un espacio pa recorda den felis memoria e fundador di e emisora cu ta Hubert 'Caruso' Booy su

gran contribucion riba e terreno di radio difusion na Aruba.

Hubert Erquilles Antonio Booy, miho conoci como Caruso, un personaje hopi conoci den radio-difusion di Aruba y Antillas (cual awendia Antillas ta conoci pa Curaçao, Bonaire, Saba, St. Eustatius y St. Maarten), y Caruso ta un di e pioneronan di e prome radio emisora-nan riba Frecuencia Modula (FM) na Aruba.

Caruso a nace na Curaçao dia 7 di November 1934, y a labora pa hopi aña den radio difusion na Curaçao na entre otro: Radio Hoyer, despues cu Radio Antillana AM (conoci awendia como Radio 1270) a worde inaugura na Aruba, Caruso a muda y bin establece su mes na Aruba, y a traha pa hopi aña como station manager di Radio Antillana.

Caruso tabata tin un estilo unico di por presenta programan musical, pa su forma



alegre di presenta programa nan musical y propaganda, y naturalmente e parti humoristico cu tabata unico riba su mes.

Despues di a traha pa hopi aña como station manager na Radio Antillana riba e frecuencia di 1270 AM, Caruso a dicidi di move cu e tecnologia pa por realiza su soño cu semper e tabata anhele, cu ta su propio radio emisora, riba e banda di Frecuencia Modula (FM).

Cu hopi esfuerso y perseverancia Caruso hunto cu su señora esposa Sira, a logra realiza e meta, di logra tin un emisora riba banda FM riba 102.7 MHz.

Caruso a ricibi fabricante di equiponan di transmission manera entre otro Hillman Associates, Moseley Associates, Harris Corporation, Mc Martin y Sintronic, cual ta yuda den un gran forma pa e emisora por tabata tin tur e equiponan di studio y transmission.

Por menciona cu den e temporada aki tabata requeri hopi equipo pa por haci transmission riba FM, manera entre otro: reel to reel, turntable, cassette, y como tambe e formato FM Stereo tabata nobo riba mercado, tabata tin mester hopi equipo pa procesa e transmission FM.

Despues cu a pasa e periodo di prueba, e radio-emisora a worde bautiza cu e nomber di su propio fundador Caruso, cual e radio emisora ta indentifica su mes como Radio Caruso Booy y cu e lema 'E Baranca di Diamante', cual transmission nan a cuminsa 19 di December 1978 for di studio nan instala na Boulevard Center (awendia Reinassance Hotel) y planta transmisora instala na Tamarijn, despues e studio nan a muda pa residencia di Caruso na Generaal Majoor de Bruinewijk # 49 na Savaneta y e planta transmisora a muda pa e sero di Hooiberg.

Radio Caruso Booy a bira un emisora hopi stima den Pueblo di Aruba y na Antillas y como tambe na Estado Falcon, Venezuela, pa su



programmacion hopi varia y alegre pa tur hende, y tambe semper tabata un placer di por a topa den e emisora Caruso mes of su señora esposa Sira y yiu nan.

Manera Caruso a expresa durante un entrevista na un canal di television, 'Musica ta haci bo alegre, musica ta pone bo sinti bon y felis, y esaki tabata e meta di Radio Caruso Booy, pa por laga e oyente sinti contento escuchando radio.

Ademas por menciona cu e emisora a sirbi como un school radial, pa hopi aña na hopi persona, cu a siña na Radio Caruso Booy presentacion di programma-nan radial y opera equiponan di studio.

Caruso mes tambe tabata activo den entre otro e club di prensa 'Aruba Press Club' bao di direccion di Sr. Jos van der Schoot (q.e.p.d.) y tabata activo den clubnan deportivo manera Essolito y varios otro organizacion den

comunidad, tambe por menciona cu Radio Caruso Booy a duna un gran aporte na comunidad di Aruba cu diferente programma nan educativo, informativo,

religioso, musical y specialmente Radio Caruso Booy a dedica su mes pa promove nos artistanan y musica cultural di Aruba.

Despues cu Caruso a bin ta sufri un quebrante di salud fuerte entre aña 1989 cu 1990, Caruso a fayece 18 di Oktober 1990 na Curaçao.

E fayecimiento aki a comove henter Aruba y Antillas cu e perdida di un di e pionero nan den radio difusion na Aruba, Caruso su entierro a tuma lugar na Aruba.

Despues di e fayecimiento di Caruso, su señora esposa Sira, a tuma e maneho di e radio over pa por a sigui cu e deseo di Caruso, pa Radio Caruso Booy a keda semper un emisora alegre y varia pa henter Aruba.